

HEADLINES (EVENING)

Date – 23/11/2024

Time - 18:30 -18:40Hrs

- Bharat Scouts & Guides North East Mini Jamboree vawi 8 na chu Chief Minister, Pu Lalduhoma, President, Mizoram Bharat Scouts & Guides ni bawk chuan vawiin khan a hawng.
- Home Minister Pu K Sapdangan Champhai District Jail chu SASCI Part IV atangin sak that a ni dawn a ti.
- BJP kaihhruai Mahayuti tangrual chuan Maharastra Assembly inthlanah chakna an chang dawn a, hetihlai hian INDIA bloc ten Jharkhand Assembly inthlanah chakna an chang dawn thung.
- Prime Minister Narendra Modi chuan naktuk Pathianni chawhma dar 11 hian Akahsvani ah 'Mann Ki Baat' programme a hmang leh dawn.

<><><>

CM

Bharat Scouts & Guides North East Mini Jamboree vawi 8 na chu Chief Minister, Pu Lalduhoma, President, Mizoram Bharat Scouts & Guides ni bawk chuan vawiin khan a hawng.

Bharat Scouts & Guides Mizoram State Training Centre, Tanhril-ah Mini Jamboree hi nghah a ni a, hawna thusawiin Chief Minister chuan, tangruala hma laknaah hlawhtlinna hmuh a ni thin a. BSG in a thiltum ber pawh tangruala India tha zawk din a ni, a chuangin he hun tawite chhung hian thian thar te hlimna thlentu ni theuh turin kalkhawmte a chah a ni.

Chief National Commissioner, Dr. KK Khandelwal chuan he hunah hian Chief Minister Pu Lalduhoman Mizoram Bharat Scouts & Guides te phur taka hma a lo lakpui thin avangin National Award sang ber Silver Elephant Award dawng turin an thlang tih a puang a, He Award dawng tura an rawtna DO letter hi Chief Minister a hlan nghal a ni.

Lehkhaah hian Bharat Scouts & Guides a thawhpaina leh phurpuina vang te, thil tha ti tura thalaite nunkawng kaihruaitu leh tichaktu hruaitu tha tak a nih avang tea he chawimawina hi pek an duh thu a inziak. He award hi President of India in a hlan thin a, hun remchang hmasa berah Chief Minister hi hlan an tum ang.

Mini Jamboree hian November ni 28 thleng a awm dawn a. Hemi chhung hian thil chi hrang hrang an zirin an tiho ang. Tun tum hi Mizoramin North East Mini Jamboree a thlen vawi hnihna a ni a. India hmarchhak bik tana ruahman a ni nain state dang atanga rawn kal pawh engemawzat an awm a, mi 300 vel an kal khawm a ni.

<><><>

MAMIT-METH

Mamit District Police (Mamit DEF) leh Narcotic Control Bureau (NCB) te Joint Operation chuan nimin khan Zamuang khaw bula motor pakhat atangin Methamphetamine kg 13 an man a, heng Methamphetamine man te hi cheng nuai za sawmruk pakua hu vela chhut a ni.

Metamphetamine phur tu mi pathum – Malsawmdinga, Khawpuichip, Felam, Myanmar, Lalhmunsiamah leh Vanlalenga, Bawngkawn Brigade Veng, Aizawl te

man an ni a. Methamphetamine man te hi a phurtute hian Kanmun kaltlanga Tripura lama kalpui an tum thu an sawi.

<><><>

SERCHHIP

Kar kalta ni 16 zing khawvar hmaa Mat phai leilet lungtui rama chin hriat lohva bo, Lalbiakzova kum 40 mi Keitum khua chu a bo atanga ni 7na vawiin khan thi a hmuh a ni.

Kan corr report lo ngaithla ang:

<><><>

HOME MINISTER

Home Minister Pu K Sapdangan Champhai District Jail chu SASCI Part IV atangin sak that a ni dawn a ti.

Champhai District tlawha zin Home Minister chuan vawiin khan Champhai District Jail leh Zokhawthar Police Station leh Land & Custom building sak tharte a tlawha, District Jail leh Zokhawthar Police Station a tlawhnaah hian thawktute nen inkawmin, thawktute hian an mamawhte Home Minister hnenah hian an lo thlen a ni.

Champhai District Jail hi mi 105 awm theihna a nih lain tun dinhmunah mi 165, mipa - 115 leh hmeichhia 14 an tang mek a. Thawktu 20 an awm mek bawk a ni.

Home Minister chuan, state chhunga Jail hrang hrangah Jail chhunga awm tur zat aia tam an awm deuh vek a ti a, mihring an pung chho zel a, sualnate pawh a pung ve zel bawk a, Jail-a lut an tam telh telh bawk a, ram mihring cheng zat nena khaikhin chuan Mizoramah Jail tang an thahnem hle a, hei hi thil pawl tak a ni, a ti.

Police te leh tlawmngai pawl ten theih tawp an chhuah zel anga hmasawna hmuh zel an inbeisei a ti a, ruihhlo laka fihlim lo Police awm ten nghawng a neih thui zia an hriat a tul a, an enkawl ram tan la thar theuh turin a sawm tih a sawi a ni.

Home Minister chuan, mi thenkhat ten Jail atangin a tha zawnga thil zir chhuah an neih lain thenkhat erawh chuan an Jail tan pui te hnen atangin thil tha lo thiam belhte an nei thin tih sawiin Jail-a hnathawktute pawhin tan an lak thar a tul hle a, mihring nun siam thatna hmun tak taka chhuah turin taima takin an enkawlte vil se a ti a. Mi thahnemngai, pawn lam atanga Pathian thu hril tute, sorkar department dang dang ten Jail tang te hnena thiam thil an zirtir thinte hi a hlut zia hriain Jail tang te pawhin lo chhawr tangkai zel se a duh a ti bawk.

Hringlang Tlang Society te sawmna angin Pu K Sapdanga hian Hringlang Tlangah hun a hmang bawk a, Mizote nuna hmun pawimawh tak humhalha enkawltu Hringlang Tlang Society te hnenah lawmthu a sawi bawk a ni.

<><><>

MUALKAWI

Vawwiin chhun dar 11:30 bawrvel khan Champhai District-Mualkawi khuaa, Champhai atanga KM 13 vela mi, Pu Lalthantluanga chenna In chu bungrua engmah chuh hman loin a kang ral.

Mualkawi YMA President Pu Lalrintluanga hnen atanga thu dawn danin In a kan lai hian a neitute innghak an awm lova, in kang hi an thenawm ten an hmu a, an hmuh hian alo kang nual hman tawh a, chhun reh lai a nih bakah an awmna hi Mualkawi veng tawp lam, Kelkang panna kawng a mi anih vangin thelh hman ani lova, an bungrua engmah chuh hman ani lo. He In kang hi semi pucca building a ni.

Kangmei chhuah thu hi Champhaia Fire and Emergency duty te pawh hriattir an ni a, an hriattir hun hi a tlai deuh tawh avang leh In chu a kan zawh deuh vek tawh avangin kang thelh tura kal mek Fire Tender lirthei te pawh kawng laka an awm laiin kohkir an ni a thudawn a ni.

<><><>

ZORO

Zo Re-Unification Organisation (ZORO) buatsaih Zofate inrawnkhawmna hunah Zofate (Chin-Kuki-Mizo) insuihkhawmleh nan hmalak zel ni se an ti.

Nimina Aizawla MZP Conference Hall-a inrawnkhawmnah hunah hian kalkhawmte chuan resolution siamin, Chin-Kuki-Mizo chu thlahtu thuhmun, tawngkhat hmang, nunphung thuhmun, serh leh sang inkhawih pawlh, beiseina thuhmun vuana dam leh tlang khatah, thih leh ruam khatah ti thin unau an ni a, Unau an nih angin inthen thei an ni lo an ti a.

ZORO in Zofate India, Bangladesh leh Myanmar a awmte insuihlehna tura hma a lo lak tawhna leh United Nations Organisation(UNO) a dawr lehna tur reng reng chu ZORO hminga thlen thin tawh nise an ti a, Zofate India, Bangladesh leh Burmaram hrang hranga thendarha awm te insuihkhawm leh theihna turin UNO-ah Memorandum thehluk ni se an ti a, heng thute hi lungruak takin an pass a ni.

He inrawnkhawmnaah hian, Myanmar, Bangladesh, Manipur, Tripura, Assam leh Mizoram atangin palai an kal a. Zohnam chipeng hrang hrang 27 atangin palai an tel bakah Myanmar Zofa MP leh MLA 7 an tel bawka ni.

He hunah thusawitu ZORO President Pu R. Sangkawia chuan, Zoram chu Zofate ta a ni a, zofate chenna tura Pathian pek a ni a, a neitu dik tak an ni a ti a, kum tam tak intlawhpawh tawn loh avangin unau inhriat loh chang pawh a awm a, chenna a hran avangin inunauna a bo chuang lova, thisen a inzawm tlat avangin a bo chuang thei lo a ti a ni.

Zofate thendarhtu ten India, Burma leh Bangladesh-ah te thendarh mahse la thlahtu thuhmun, nunphung thuhmun, serh leh sang inkhawihpawlh, thih leh ruam khatah ti thin unau dik tak an ni" a ti.

<><><>

LAWNGTLAI

Lawngtlai District Deputy Commissioner's Office, bultuma 'Citizen Care-Grievance Redressal Day' (Khua leh tuite Ngaihsak-Harsatna Chinfel Ni) thawh li na chu nimin khan Sangau-a BDO Conference Hallah hman a ni a. Tlai dar 1:00 atanga dar 4:00 thlengin sawrkar department hrang hrangte chu mipuite dawr theihin an inpho chhuak a ni.

Khua leh tuite Ngaihsak-Harsatna Chinfel Ni' puala hun hmannaah hian sawrkar Department 15 - te chu mipuite dawr theih turin dawhkan hrang hrangah an inpho chhuak a ni.

'Khua leh tuite Ngaihsak-Harsatna Chinfel Ni' hman tawhah mipuiten hlutin an ngaipawimawh hle tih kan corr chuan a sawi aa, mi thahnem takin department hrang hrang inpho chhuak te hi dawrin, harsatna an neih ang angte an thlen nghal thin a. Sangau a hun hmanna pawh hi mipuiten hlutin an ngaipawimawh hle a; Lawngtlai kal kher ngai lo a, sawrkar official-ten an lo kal chilh chu thinlung taka an lawmthu an sawi a. Mi thahnem takin sawrkar department hrang hrang inpho chhuakte hi dawrin an harsatnate an thlen nghal a, hlawk thlak an tih thu an tarlang bawka.

He puala hun hi Pu Cheemala Siva Gopal Reddy, Lawngtlai bawrh sap, Pu Lokeshwaran R, Lawngtlai Superintendent of Police, Pu Zoramsiama Hmar, Addl.DC, Pi Margaret J. Vanlalremmawii, SDO (S), Pu Robert S. Beihrosa (SDPO), Pu Dinesh Kumar Muhal, SDC leh department hotute Sangau ah hian an kal a ni.

DC hian vawiin khan Sangau-IV lei tlahniam tlawhin, Disaster Management & Rehabilitation hnuai Mitigation hnathawh leh hmalak dan a enfiah a, Far Pak Self Help Group- te a kawm nghal a ni.

Pu Cheemala Siva Gopal Reddy, chuan Chhiatrupna lo thleng lakah nunna chan emaw thil tihchhiat tam lo tura hmalak kawngah DM& R hnathawh a fakawm hle a ti a. Khuarel chhiatna chu thleng thei reng a nih avangin tha thlah lo tur leh engtik lai pawha chhhanchuah hnathawh a chhuak thei tura in ral ring reng turin a chah a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

<><><>

COUNTING

BJP kaihhruai Mahayuti tangruai chuan Maharashtra Assembly inthlanah chakna an chang dawn a, hetihlai hian INDIA bloc ten Jharkhand Assembly inthlanah chakna an chang dawn thung.

Vawiin khan heng state pahnih Assembly inthlan vote te hi chhiar a ni a, Maharashtra ah hian seat 288 ah hriat theih chinah BJP leh a thawhpuite hian seat an lak tawh leh hma an hruaina hi avaiin 221 a ni a.

Kan Corr report I lo ngaithla ang u

Seat 81 awmna Jharkhand-ah chuan sawrkar lai JMM leh an thawhpui INDIA bloc tangrualten seat an lak tawh leh hma an hruaina hi 49 a ni a. NDA leh a thawhpuiten seat an lak leh hma an hruai mekna hi 27 a ni thung.

Kan Corr report I lo ngaithla le hang u.

Heng bakah hian Lok Sabha seat 2 leh Assembly seat 46 by-election vote chhiar a ni bawk a.

Hriat theih chinah Kerala-a Wayanad Lok Sabha seat ah Congress hruaitu Priyanka Gandhi Vdra chuan vote nuai 3 chuangin hma a hruai a, Nanded ah hian BJP candidate Dr. Santukrao Hambarde chuan hma a hruai bawk a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 116-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>